

Siunnersuummut nassuiaatit

Nassuiaatit nalinginnaasut

1. Aallaqqaasiut

Siunnersuummi siunertaavoq pisortani akiliisarnermik ingerlatsinermi nutarsaanissamik aamma pisariillisaanermik tunngaviliinissaq, kiisalu innuttaasut aamma suliffeqarfiit assingusumik – imaluunniit pitsanngorsakkamik – atugaqarnissaannik pilersitsinissaq.

Sipaarniarneq siunertaralugu, IT-kkut ineriartortitsinermit, allaffissornermut il. il. aningaasartuutaanerusussanut annertoorujussuusussaagaluartunut, pisortat akiliisarnerat il. il. pillugu Danmarkimi inatsit, NemKontomik aaqqiissummut, Danmarkimi atorpeqartumut siunnersuut tunngaveqarpoq. Taamaasilluni Kalaallit Nunaanni oqartussaasut Danmarkimi NemKontomik aaqqiissummut ilanngunnissaat sulissutigineqarpoq. Kisianni Danmarkimi inatsisit atuuttut naapertorlugit aningaasat karsimiittut pillugit aalajangersakkanik ilanngussisoqanngilaq, taakku akiitsut akilersinniarneqartarnerat pinaveersaartinnissaallu pillugit Inatsisartut inatsisaanni § 6 a, imm. 1-imi oqaaseqatigiinni kingullerni ilaareermata, kiisalu elektroniskimik akiligassiissutit, pissutsini taamaattuni, Qarasaasiakkut akiliisitsisarnerup aqunneqarnera pillugu Inatsisartut inatsisaat nr. 50, 23. november 2017-imeersoq naapertorlugi aaqqiivigineqartarmata. Ilangullugu pisortani oqartussaasut akornanni akiliinernik nuussinerit pillugit aalajangersakkanik ilanngussisoqanngilaq. Tamakku saniatigut siunnersuut piginnaasatigut pissutsinut il. il. maani nunami atuuttunut naleqqussarneqarpoq.

NemKontomik aaqqiissut, nammineq suliarisartakkat isumaginninnerillu annikinnerusut aqutigalugit akiliisarnernut atatillugu pisortani pisariillisaanermut sipaaruteqarnermullu tapersiissaaq.

Ukiut 50-it kingulliit ingerlaneranni aningaasanik atuinermi allanngoriartortoqarpoq. Pingaartumik akiliinernik annerusunik, soorlu akissarsianik tunniussinermi, aningaasat akiliissutitut sionatigumut sanilliullugit annikinnerulerput. Ilangullugu ullumikkut innuttaasut suliffeqarfiillu tamangajammik aningaaserivimmi kontoqarput. Ineriartornerup taamaasilluni pisortani allaffissornermut, innuttaasut suliffeqarfiillu tamarmik aningaaserivimmi kontoqarnerannik aallaaveqartumut aaqqissuunnissamut tunngaviit pisariaqartut pilersippai.

NemKonto »nammineq toqqagassaavoq«, kontu innuttaasunit suliffeqarfinillu ataasiakkaanit toqqarneqarsinnaassammat. NemKontomik toqqaaneq akornutaanngilaq, innuttaasut imaluunniit suliffeqarfiup, akiliinerup aalajangersimasup kontumut allamut ikineqarnissaanut taasisinnaanerannut.

Innuttaasunut suliffeqarfinnullu amerlasuunut, pisortanit oqartussaasunit assigiinngitsunik pisartagaqartunut, NemKonto oqilisaataasussaavoq, tassani oqartussaasunut assigiinngitsunut kontunormumik paasissutissiinissaq pisariaarutissammat.

Pisortat inatsisaanni aalajangersaaneq qarasaasiakkut aaqqiissutitut ikaarsaarnermi, kiisalu nammineq sulianik killilersuineq pisortani teknologiimik periarfissanik atuinerup siuarsarnissaanut tulluartsinnaasoq nalilerneqarpoq.

Ullumikkut pisortani oqartussaasut akiliisarnermi ingerlatsinerat pillugu qarasaasiakkut aaqqiissutit atugaqarsinnaanermut akornutaasinnaasunik inatsisitigut malittarisassaartoqanngilaq. Aamma tamatumani piumasaqaatinik minnerpaaffiliisunik aalajangersakkanik malittarisassaartoqanngilaq.

Kalaallit Nunaanni aningaaseriviit Danmarkimit IT-kkut nioqquteqartunik, Danmarkimilu aningaaserivinnut IT-kkut sullissinermi nioqquteqarnermik immikkut ilisimasaqartunik atugaqarput. Taamaammat aningaaseriviit NemKontomik aaqqiissut ilisimareerpaat, naatsorsuutigivaallu siunnersuutip atuutilersinneqarnera ajornartorsiutaassanngitsoq.

2. Siunnersuummi immikkoortut pingaarnert

Pisortani oqartussaasut automatiskimik elektroniskiusumik akiliisarnermi ingerlatsinermut nuussappata, innuttaasut suliffeqarfiillu aningaaserivimmi kontoqarnissaat piumasaqaataavoq pisariaqartoq.

Siunnersuutip, Kalaallit Nunaanni inuit 18-it sinnerlugit ukiullit (ilaatigullu aamma inuit 18-it inorlugit ukiullit) aamma suliffeqarfiit aningaaserivimmi kontumik (NemKonto) innersuussinissaanut kinguneraa. Inuit imaluunniit suliffeqarfiit aningaaserivimmi allami kontumik innersuussisimangippata, matumunnga akiliinerit pisussaaffeerutsitsisut naammassineqarsinnaapput.

Innuttaasut ataasiakkaat NemKontotik, matuma ataani aningaaserivik aamma kontumi piumasaqaatit il. il. nammineq toqqassavaat. Tamatuma saniatigut innuttaasut aamma suliffeqarfiit kontunik aalajangersimasunik, akiliinermut aalajangersimasumut akiliiffigisassanik innersuussinissamut periarfissaqassapput. Inuit suliffeqarfiillu ataasiakkaat, kontumik toqqaanissaq akisussaaffigaat. Kontu toqqarneqartoq ass. kontusinnaavoq arlalinnik pigineqartoq. Kontumut akiliinerit pisortanut pisussaataaffecterutsitsissapput. Qaqugukkulluunniit aaqqissuussinermik akisussaasusunut NemKontomik/NemKontomik paasissutissiissutigineqartunik allannguisoqarsinnaavoq.

NemKonto taamaallaat kontunik allanik akiliiffigisinnaasanik paasissutissanik peqannginnermi atorpeqassaaq. Taamaammat isumaqanngilaq NemKontop pisortat akilersuutai tamarmik kontumut ataatsimut akilerneqartarnissaanut kingunerissagaa.

Aningaaserivik aalajangersimasoq kontulu akiliiffigisassaq, innuttaasup aamma suliffeqarfiup suli nammineq aalajangigassarivaat. Taamaasilluni siunnersuutip innuttaasup aamma suliffeqarfiup aningaasaatiminik atoriaannaasaminik aqutsinissaanut ajorseriartitsinngilaq.

Inuup/suliffeqarfiup ataasiakkaap aamma aningaaseriviup allat susassarinnngisaattut suleqatigiinnissaannut aningaaserivimmi kontumut piumasaqaataasooq siunnersuutip allanngortinngilaa. Inatsisissatut siunnersuut malittarisassanik, sullitap aningaaseriviullu akornanni attaveqarneq pillugu inatsisini allani malittarisassanik allannguinngilaq imaluunniit ilaartuinani. Assinganik pisussaataitanermut pillugit inatsisitigut tunngavinnut nalinginnaasunut, sullitap ataatsip aamma aningaaseriviup ataatsip akornanni pissutsinik aalajangersaasunut tunngatillugu atuuppoq. Ass. aningaaseriviit kontuni aningaaserivimmiitsitani ilanngullugit naatsorsuisinnaanerit siunnersuut pissutigalugu annertusineqassanngillat imaluunniit ajorseriarneqassanngillat.

Aningaaseriviup inuk aningaaserivimmiitsitanut kontumik neqeroortussaananeramik aallaavittut pisussaaffimmik peqanngilaq, aningaaseriviilli inuinnarnut sullitanut aningaaserivimmiitsitanut kontumik, akissarsianik imaluunniit pisortat tapiissutaanik ikisivissatut siunertalimmik pilersitsinissamat pisussaaffeqarput.

Kalaallit Nunaanni aningaaserinermik suliffeqarfiit ileqqorissaarnissaat pillugu nalunaarut malillugu, nalunaarut nr. 252, 1. april 2005-imeersoq, § 12, aningaaserivik, aningaaserivimmiitsitanut kontumik pilersitsinissamik itigartitsisoq, tamanna pillugu sukumiisumik tunngavilersuissaaq. Inuup kontumik pilersitserusuttup, pisortanit ikiorsiissuteqarnera imaluunniit allanik ikiorsiissutinik isertitaqarnera piviusorsiutaasumik tunngavilersuutaanngilaq. Kisiannili sullitap itigartinneeranut tunngavilersuutigineqarsinnaavoq, sullitaq nakuuserpat imaluunniit ajortumik pissusilersorpat kiisalu aningaaseriviup sulisuinut imaluunniit sullitanut akornutaappat.

Aningaaserivik inuussutissarsiummik ingerlataqartumut kontumik pilersitsinissamik pisussaaffeqanngilaq. Kalaallit Nunaanni aningaaserinermik suliffeqarfiit ileqqorissaarnissaat pillugu nalunaarummi, aningaaserivimmiitsitanut kontumik pilersitsinissamat itigartitsinermut tunngavilersuilluarnissamat piumasaqaat, inuussutissarsiornermi sullitanut atatillugu atuutinngilaq, tak. nalunaarummi § 1, imm. 2. Suliassaqarfimmi tassani isumaqatigiissuteqarnermut kiffaanngissuseqarneq pillugu nalinginnaasumik aallaaveqarneq tamakkiisumik atuuppoq, annertunerusumik ataani nassuiaat takuuk.

Innuttaasut suliffeqarfiillu ataasiakkaat, NemKonto qanoq kontuminnut allanut ilaassanersoq nammineerlutik aalajangissavaat.

Siunnersuut naapertorlugu, innuttaasooq imaluunniit suliffeqarfik kontumik nammineerlutik innersuussinngippata imaluunniit innersuussisinnaanngippata Naalakkersuisut akiliisarnerup qanoq ingerlanissaa pillugu malittarisassanik aalajangersaasinnaapput.

Inuit aningaaserivimmi kontoqanngitsut tassaapput, aningaaserivimmi kontoqarnissamut kissaateqanngitsut imaluunniit kontumik pilersitsinissamut periarfissaqanngitsut. Siunnersuummi Naalackersuisut pisinnaatinneqarput akiliisaarnerup qanoq ingerlanissaanut malittarisassanik aalajangersaanissamut, tamanna pillugu inuk imaluunniit suliffeqarfik nalunaarfigineqareerpat pisortani oqartussaasunut pisussaaffeerutsitsissaaq. Tamanna pisortani oqartussaasut kontumik pilersitsineratigut pisinnaavoq, inuk imaluunniit suliffeqarfik pineqartoq tassani nammineq kontumik piginnittussatut kissaateqarsinnaavoq, imaluunniit kontu Namminersorlutik Oqartussanit imaluunniit kommunimit pigineqarsinnaalluni. Kontu aningaaserivimmi, Namminersorlutik Oqartussat isumaqatigiissuteqarfiani pilersinneqarsinnaavoq.

Kontu pisortat pigippassuk, innuttaasoq imaluunniit suliffeqarfik pineqartoq tiguisinnaatitaassaaq.

Tunngavimmik inuup eqqarsaatiginerata aamma pisortani pisariillisaanissamut kissaatit eqaatsumik periarfissaqartilernerat qulakkeerneqarpoq.

Aningaaseriviit inuup aamma suliffeqarfiup kontumik ammaaniarnerat itigartissinnaavaat, tak. qulaani allassimasut. Tamanna aamma NemKontomut atuutissaaq. Pissutsit naapertorlugit inuit kontumik pilersitsinnaanermut itigartinneqarsinnaapput, ersarissumik aamma sukumiisumik tunngavilersuisoqarpat. Ilaatigut aamma inuit nakuusertut imaluunniit ajortumik pissuseqartut itigartinneqartarput.

Assigisaanik angerlarsimaffeqanngitsut il. il. ullumikkut aningaaserivimmi kontutaarnissaat ajornakusoorsinnaavoq, angerlarsimaffeqanngitsut kinaassutsimut uppersaatertik annaasarnerat pequtugalugu.

Naalackersuisut inunnut, aningaaserivimmi kontumik pilersitsinissamut periarfissaqanngitsunut akiliisarnissaaq pillugu malittarisassanik aalajangersaanissamut piginnaatinneqarput. Piginnaatitsissut, eqimattat pineqartut pisariaqartitaannut periarfissaannullu tulluuttunik, aaqqiissutinik ataasiakkaajunerusunik aaqqissuussinissamut allanngorarsinnaanerunermik aamma periarfissaqarnerunermik qulakkeerinninnissamut tapiissutaasinnaavoq.

NemKontomik allanngineq paasissutissanik taakkunannga aaqqissuussinermut akisussaasuusut ilaannut Naalackersuisunit toqqarneqartumut pissaaq. Piumasaqaatigineqarsinnaavoq, aaqqissuussinermut akisussaasutut toqqakkap NemKontomik allaffissornera, aningaaseriviup kontunik ingerlatsineranut taamaattumillu ilusilersornerinut ilaasutut suliarineqassasoq.

Naalackersuisut aalajangersinnaavaat, inuk imaluunniit suliffeqarfik nuuttoq CPR-imut imaluunniit CVR-imut nalunaarsuiffimmuut nalunaarsorneranut atatillugu, aaqqissuussinermik akisussaasumut NemKontomik paasissutissiissasoq.

NemKontomik innersuussinissamut pisussaaffimmik illuartitsinerup nassatarisinnaangilaa, innuttaasup imaluunniit suliffeqarfiup nalunaarsorneqarsinnaannginnera, nalunaarsuinissamut piumasaaqatit sinneri eqqortinneqarpata.

NemKonto aningaaserivimmi Kalaallit Nunaanni angerlarsimaffeqartumi kontuusariaqanngilaq, aamma aaqqiissut § 1 naapertorlugu inunnt suliffeqarfinnullu Kalaallit Nunaanni najugaqartunut taamaallaat atuukkaluarluni.

Inuusuttut 18-it inorlugit ukiullit, ikiorsiissutinik tigusineq ajortut imaluunniit akileraarutitigut sinneqartoorutinik tigusassaqaanngitsut, NemKontomik peqartariaqanngillat. Pisortani oqartussaasunit innuttaasumut akiliinermut siullerpaamut atatillugu kingusinnerpaamik, aaqqissuussinermi akisussaasuusumut kontumik nalunaarutiginnineq pissaq. Siunnersuummi § 1, imm. 3, tassungalu nassuiaatit innersuunneqarput.

Toqusoqarnerani imaluunniit suliffeqarfiup atorunnaarnerani il. il. nalunaarsuivimmi NemKonto peerneqassaaq. § 2, imm. 3-mi nassuiaatit innersuunneqarput.

Siunnersuutip Naalackersuisut nalunaarsuivimmik NemKontot pillugit paasissutissanik imaqartumik pilersitsinissamut malittarisassanik aalajangersaanissamut piginnaatissavai. Anguniagaavoq ajornanngitsumik nikerarsinnaasumillu innuttaasuni, suliffeqarfinni pisortanilu iluaqutissanik annikinnerpaanik atuilluni pilersitsinissaq qulakkeernissaanut.

Siunnersuut § 5, imm. 2 naapertorlugu, Naalackersuisut inuit aamma inatsisitigut pisinnaatitaasut aningaaserivimmi kontu pigisaat pillugit paasissutissanik aallersinnaanissamut piginnaatinneqarput. Paasissutissat pisortani oqartussaasut allanit aamma akissarsialerivinnit aaneqarsinnaapput. Inuit suliffeqarfiillu nammineq ingerlattut nammineerlutik nalunaarsuivimmut kontumik nalunaaruteqarnissamut periarfissaqarnissaannut siunertaavoq.

3. Pisortanut aningaasaqarnikkut allaffissornikkullu sunniutissat

Siunnersuut pisortani soorlu kommunini, Namminersorlutik Oqartussani il. il. akiliisarnermi ingerlatsinerup iluani iluaqutissanik atugassanngortitsinerumut tunngavissiivoq. Ataatsimut siunnersuut oqartussaasuni akiliinernik ingerlataqartuni annertuumik sipaaruteqarnermik nassataqassasoq missingerneqarpoq. Assersuutigalugu Akileraartarnermut Aqutsisoqarfiup ukiut tamaasa akileraarutitigut sinneqartoorutinik, utertitsinernik assigisaannillu akiliinerit annertuut suliarisarpai. Ukiumoortumik akiliinerit ukiumut 25.000-it sinnertarai missingerneqarpoq. Innuttaasup Akileraartarnermut Aqutsisoqarfimmut kontu suna akiliiffigissaneraa paasissutissiissutigisimangippagu, aqutsisoqarfiup paasissutissat NemKonto pillugu nalunaarsuivik aqutigalugu aassavaa, tamannalu piffissamik sipaarfiussaaq. Taamatuttaaq pisortani oqartussat innuttaasunut suliffeqarfinnullu, tassunga ilanngullugit kommuninut, akiliisut pineqartup kontoa pillugu paasissutissanik pissarsisinnaanerup kinguneranik piffissamik sipaarsinnaapput.

Sipaarutaasinnaasoq aatsaat piviusunngortikkiartuaarneqarsinnaavoq, aaqqissuussinermi aaqqiissutinik nutaanik pilersitsinikkut, kiisalu aaqqissuussinernik suleriaatsinillu atuutereersunik allanngortitsinikkut naleqqussaanermikkullu.

Naatsorsuutigineqarpoq aaqqissuussaareersunut aamma suleriaatsinut naleqqussaanermut aningaasartuutit maannamut aningaasaliissutaareersunit aningaasaliiffigineqassasut. Tunisassiat niuerfinni ilisimaneqarluareersut eqqartorneqarput.

NemKonto pillugu nalunaarsuivik 2021-p ingerlanerani ingerlanneqalernissaanut anguniarneqarpoq.

Aningaasartuuteqarneruneq ilaatigut NemKonto pillugu nalunaarsuivimmik pilersitsinermut ataasiartumik aningaasartuuteqarnermik, ilaatigullu ingerlaavartumik ingerlatsinermut aamma aserfallatsaaliuineranut aningaasartuutinik imaqqassasoq naatsorsuutigineqarpoq. Kontunik il. il. nalunaarsuineranut atatillugu pilersitsinermut aningaasartuutit 1 mio. kr.-ussasut aamma ingerlaavartumik ingerlatsinermut aserfallatsaaliuineramullu 200.000 kr.-ussasut qularnartumik naatsorsuutigineqarput.

Kiisalu NemKonto pillugu siunnersortinit ikiutissat aamma paasissutissanut aningaasat pisariaqartinneqarput. Ataasiartumik aningaasartuutaasussat taakku 1 mio. kr.-ussasut qularnartumik naatsorsuutigineqarput.

NemKonto pillugu nalunaarsuivimmi il. il. atuineq pillugu isumaqatigiissutit inaarutaasut, taaneqareersutut piffissamik sipaaruteqarnermut sunniuteqassapput, taamaasillunilu siunnersuutip missingersuummi sunniutissaanut sunniuteqassallutik.

4. Inuusutissarsiornermut aningaasaqarnikkut allaffissornikkullu sunniutissat
Siunnersuutip suliffeqarfiit allaffissornerat taamaallaat sunnissavai.

NemKonto pillugu siunnersuutip suliffeqarfiit amerlanerpaartaannut allaffissornikkut annikinnerusumik oqilisaanissamik imaqqarpoq.

5. Avatangiisimut, pinngortitamut inuillu peqqissusaannut sunniutissat
Siunnersuut avatangiisinut, pinngortitamut inuillu peqqissusaannut sunniuteqassasoq naatsorsuutigineqanngilaq.

6. Innuttaasunut sunniutissat
Siunnersuut innuttaasunut amerlanernut oqilisaanermik imaqqassaaq, taamaasillunilu allaffissornikkut suliakkersuissannginneranut missingerneqarpoq.

NemKontot pillugit nalunaarsuivimmik pilersitsinermi annertusisamik eqqarsaatigineqassapput innuttaasut piumasaat. Innuttaasup qaqugukkulluunniit NemKontoni allanngortissinnaavaa.

Immikkoortoq I:

Innuttaasut, namminneq NemKontomik nalunaaruteqarusuttut, tamatumunnga ammaanneyassapput.

Immikkoortoq II:

Innuttaasunut, immikkoortoq I-imi nalunaaruteqarsimanngitsunut, akissarsialerivinnit, kiisalu pisortani oqartussaasunit kontut, ullumikkut aningaasarsiat tapiissutisiallu akilerneqartarfii pillugit paasissutissanik aallertoqarsinnaavoq. Tamanna pillugu innuttaasoq ilisimatinneyassaaq.

Immikkoortoq III:

Innuttaasut, immikkoortoq I-imi imaluunniit II-mi katersorneqanngitsunut, NemKontomik nalunaaruteqarnissaq pillugu inummut attuumassutilimmut saaffiginnikkut qinnuteqassapput. Kontumik innersuussineq, pisortani oqartussaasup akiliineranut siullermut atatillugu kingusinnerpaamik pissaaq.

Eqimattat aningaaserivimmi kontoqanngitsut, Namminersorlutik Oqartussanit imaluunniit kommunimit NemKontomik pilersitsineratigut pigineqarneratigullu isumagineqarumaarput, kisiannili inuk pineqartoq tassangaanniit tigusinnaatitaassaaq. Innuttaasoq qaqugukkulluunniit nammineq NemKontomik nalunaaruteqarnissaminut iliuseqarsinnaavoq.

Inunnik isumaginninnermi siunertaasinnaavoq pinngitsuussallugu, eqimattat immikkut ittut aningaaserivimmi kontumik pilersitsinissamut ass. isumaginninnermi ikiorsiissutinik tigusiffigisartagassamik itigartitaanissaat. Taamaattumik anguniarneqassaaq eqimattanut taakkununga aaqqiissummik ineriartortitsinissaq. Tamanna angerlarsimaffeqanngitsut, tarnikkut nappaatillit il. il. kinaassutsimut uppernarsaateqarnissamut periarfissaanut atuuppoq, kiisalu aningaasanik tigutsimmik, aningaasanik tigusisarfinni automatini taamaallaat tigusissutaasinnaasumik peqarnissamut periarfissaannut atuulluni, ass. inunnut nakuusertartunut imaluunniit ajortumik pissuseqartunut.

7. Sunniutissat annertuut allat

Siunnersuut allanik annertuunik sunniuteqassasoq naatsorsuutigineqanngilaq.

8. Oqartussaasunik kattuffinnillu il. il. tusarniaaneq

Siunnersuut ulloq 21. januar 2020 tusarniaavimmi www.naalakkersuisut.gl saqqummiunneqarpoq, kingusinnerpaamillu ulloq 10. februar 2020 akissuteqarfissaalluni.

Siunnersuut piffissami 14. januarimit 10. februar 2020-mut tusarniaaffigisani tulliuttuni tusarniaassutigineqarpoq:

SIK, IMAK, ASG, PPK, AK, GE, KNAPK, Deloitte, Grønlands Revisionskontor, BK Revision, EY Grønland, BDO, Grønlandske Advokater, GrønlandsBanken, Banknordik,

Avannaata Kommunia, Kommuneqarfik Sermersooq, Kommune Qeqertalik, Qeqqata Kommunia, Kommune Kujalleq, Naalakkersuisut Siulittaasuata Naalakkersuisoqarfia, Inuussutissarsiornermut Nukissiuuteqarnermullu Naalakkersuisoqarfik, Aalisarnermut Piniarnermut Nunalerinermullu Naalakkersuisoqarfik, Pinngortitamut Avatangiisinullu Naalakkersuisoqarfik, Ineqarnermut Attaveqaqatigiinnermullu Naalakkersuisoqarfik, Ilinniartitaanermut, Kultureqarnermut Ilageeqarnermullu Naalakkersuisoqarfik, Nunanut Allanut Naalakkersuisoqarfik, Peqqissutsimut Naalakkersuisoqarfik, Isumaginninnermut, Inatsisinillu Atuutsitsinermit Naalakkersuisoqarfik, Datatilsynet, Moderniseringsstyrelsen.

Tusarniaanermut akissutit tulliuttunit tiguneqarsimapput:

Pinngortitamut Avatangiisinullu Naalakkersuisoqarfik, Aalisarnermut Piniarnermut Nunalerinermullu Naalakkersuisoqarfik, Nunanut Allanut Naalakkersuisoqarfik Isumaginninnermut, Inatsisinillu Atuutsitsinermit Naalakkersuisoqarfik, Banknordik, ASG, Peqqissutsimut Naalakkersuisoqarfik, GrønlandsBanken, Datatilsynet, Kommune Kujalleq, GE, SIK, Kommuneqarfik Sermersooq, Ilinniartitaanermut, Kultureqarnermut Ilageeqarnermullu Naalakkersuisoqarfik.

Nassuiaatit tiguneqarsimasut ataani naalisarlugit nalinginnaasumik allannilimmik allaneqarsimapput, Naalakkersuisullu oqaaseqaataat *uingasumik* allaneqarsimallutik.

Nunanut Allanut Naalakkersuisoqarfik nassuiaasimavoq nunat avannarliit naalakkersuisuisa Nunat Avannarliit nunarsuarmi peqataasitsinerpaat ilaanissaanut siunertaasoq. Taamaammat pingaaruteqarpoq maannakkut inatsisissatut siunnersuutip siunertamik ikorfartuissasoq aamma nunani avannarlerni innuttaasut suliffeqarfiillu Kalaallit Nunaannut attuumassutillit imaluunniit attuumassuteqarsimasut pingaaruteqartut, taakku pisorta qarfinnit akiliinernik pilersitsisut passussinnaanissaanut. Tassunga atatillugu, aningaasanik DKK-mit aningaasanut allanut nuussisarnerit akitsunneginnissaat qulakkeerneqartariaqarpoq.

Siunnersuut nunami allami aningaaserivimmi kontumik soorlu NemKontomik innersuussinissamik periarfissiivoq. Innuttaasoq assersuutigalugu islandimi kontumik soorlu NemKontomik innersuussissaguni, Inatsisartut inatsisaat malillugu periarfissaassaaq. § 1-imut nassuiaat aamma takuuk. Aningaasanik allanut aggartitsinissaq pillugit aningaasartuutit siunnersuutip matuma killingisa malittarisassiornissaannut avataaniipput.

Peqqissutsimut Naalakkersuisoqarfiup apeqqutigaa, sulisut sionatigut Kalaallit Nunaanni peqqinnissaqarfimmi sulilernerminni NemKontomik pilersitsisimasut kontortik piginnarsinnaaneraat?

Innuttaasup NemKontoa pillugu paasissutissat atorfeqarnerup allanngornerata kingorna peerneqarnaviangillat.

Piffissamik sivikitsumik peqqinnissaqarfimmi atorfeqarnermi NemKontomik qallunaat nunaanni pilersinneqarsimasumik piginniinnarnissaq periarfissaanersoq erseqqissuussaaq.

Siunnersuut aningaasaateqarfimmi kontumik, soorlu ilagalugu NemKonto innersuussiviusinnaaneranik periarfissiivoq.

Taakku saniatigut, qanoq ililluni peqqissaasutut sulisut aningaasarsiassaasat sinneruttut tunniunneqarnissaat pillugu NemKontomik aaqqissuussaaq peqqinnissaqarfimmi atorfeqarnerup naanerata aallareernerullu kingorna qanoq inissisimanersoq erseqqissarneqarnissaanut kissaatigineqarpoq.

Siornatigut atorfeqarsimasup nuunnerata kingorna NemKontoni atorunnaarsippagu, Peqqinnissaqarfik aamma pisortaqarfiit allat assinganik innuttaasup aningaasarsiai sinneruttut sumut nuussanersut pillugit ullumikkutut attaviginiarsinnaavaat.

Uani ersarinngilaq, § 3, imm. 1-imut oqaaseqaat ”nunamut allamut” qanoq isumaqarnersoq.

Tassunga atatillugu, nunat allat isumaqarpoq naalagaaffeqatigiinnerup avataani inissisimasut.

Peqqinnissaqarfiup taakku saniatigut innuttaasut eqimattakkaat ajornartorsioreersut ernumagai. Inatsisissatut siunnersuutip matuma eqimattakkaat Kalaallit Nunaanni innuttaareersut immikkoortillugit sunnissappagit naleqquttuunngilaq.

Siunnersuutip matuma siunertaraa eqimattakkaat immikkoortitaareersut pissutsinut naligiissinneqarnerunissaat pillugu annerusumik ersarinnerulersinneqarnissaat.

Peqqinnissaqarfik sullissisut akiligassiissutinik eqquutsitsinngitsut pillugit, NemKontomik aaqqissuussamik siunissami atortuulersitsinissamik qanoq oqaloqateqarnej/attaveqatigiinneq qulakkeernejarnissaanut ersarinnerusunik killigititassanik ujartuivoq.

Pisortaqarfiup aamma sullissisup akornanni qanoq attaveqatigiinneq aalajangersimasumik killilernejarnissaa qanoq ingerlanneqassanersoq eqqortuusorinannngilaq. Malittarisassat taakku piviusunngortinneqartussatut naatsorsuutigineqartut, pisortaqarfiit aningaasarsialerisarnermi aaqqissuussisimaneranut ataasiakkaanut, tamatumalu saniatigut pisortaqarfiit annertussusaat aamma pisortaqarfiit suut akisussaaffigisaannut aporfussannngillat. Taamaammat annertunerusumik pisortaqarfiit ataasiakkaat aningaasarsialerineri aaqqissuussinermi suli kiffaannngissuseqarfeqassapput.

Grønlandsbankenip paasissutissiissutigaa, IT-mik sullissisortik aamma qallunaat nunaanni aningaasaateqarfinnut arlalinnut IT-kkut aaqqissuussanik sullissillutik, tassa taamaallaat

ataasiinnarmik NemKontoqarnissaq periarfissaasoq – aamma qallunaat nunaanni imaluunniit Kalaallit Nunaanni aningaasaateqarfiunersoq apequtaanngitsoq.

Siunnersuutip NemKontomik ataasiinnaarmik innersuussinissaq aallaavigaa. Siunnersuut § 4, imm. 2 NemKontomik ataaseq sinnerlugu pilersitsisinnaanermut akuersisumik malittarisassiinissamut periarfissiivoq. Nalunaarusiaq taamaallaat piffissami naleqquttuusorisami aamma pisinnaatitsinermik taama ittumik periarfissiinermik pisoqassangatillugu ilanngunneqarpoq.

Datatsilynet isumaqarpoq, Naalakkersuisut Inuit Allattorsimaffiat § 5 inatsit pillugu piumasaqaataanut naliliinerat inatsisissatut siunnersuutip oqaaseqataani ilaasariaqartoq.

Siunnersuut § 2-mi oqaaseqaatinut ilanngunneqareerpoq.

Datatsilynet isumaqarpoq, paasissutissat pisariaqanngitsumik annertusinissaannut aarlerinaat eqqarsaatigisariaqartoq, Nem-Kontomik nalunaarsuiffik paasissutissanik arlalinnik maannakkumut pisortaqarfinni pisariaqanngitsumik pigineqartunik imaqarsinnaanera ilimanarmat.

Imaassinnaavoq paasissutissat pisariaqanngitsut qalleraattut. Aarlerinartoq tamanna ilaatigut, § 5-imit oqaaseqaatit tunngavigalugit, piiaanissamut piffissami aalajangiinikkut killilerneqassaaq, ilaatigullu paasissutissat siusippallaamik piarneqarsimappata, NemKontomik pilersitseqqinnermut attuumatillugu naleqqiussinikkut killilerneqarluni. § 5-imit oqaaseqaatit ataanni allassimasut malillugit piiaanissamut piffissaliussaqq pillugu nalunaarut atsiorneqannginnerani Datatsilynetimut saqqummiunneqarumaarpoq.

Datatsilynetip siunnersuutigaa, inatsit 2, imm. 2 siunnersuummi oqaaseqaatit, NemKontomik nutaamik innersuussisoqarpat NemKonto ”pisoqaq” allattorsimaffimmit peerneqarnissaa pillugu erseqqissarneqassasut.

Siunnersuut ilanngunneqarpoq.

Datatsilynetip malugeqquaa, inuit paasissutissaannik sullissineq inunnik paasissutissanik suliarinnittarneq pillugu inatsit tunngavigissagaa, aamma Naalakkersuisut inuit paasissutissaannik sullissineq inatsimmik sorlermik tunngaveqassanersoq isumaliutigissagaat, kiisalu pissutsit taakku inatsimmut siunnersuummut oqaaseqaatini erseqqissarneqassasut ilisimateqqaat.

Siunnersuut § 2-mut oqaaseqaatinut ataani allassimasunut ilanngunneqarpoq.

Datatsilynetip, kikkut paasissutissanik sullissinermut akisussaasuusut isumaliutiginninneqarsimanersoq imaluunniit paasissutissanik sullissisoqarnerseqqissorinngilaa. Datatsilynetip tamanna ersarinnerusumik inatsisitigut oqaaseqaateqarnissaanut innersuussutigaa. Paasissutissanik sullissisumik aaqqissuussamut akisussaasoq toqqarneqarsimappat, aammattaaq Datatsilynetip paasissutissanik sullissinermut isumaqatigiissut, Inuit Allattorsimaffiat pillugu Inatsit § 42, imm. 2 aaqqinneqassasoq malugeqquaa.

Siunnersuutit §§ 5 aamma 6 oqaaseqaataanut ataani allassimasunut ilanngunneqarput.

Kommune Kujalleq, § 8-mi allassimareersumut minnerpaamik inatsisip oqaaseqaataanut toqqaannartumik allanneqarnissaa eqqarsaatigineqartariaqartoq unnersuussivoq.

Aalajangersagaq atorunnaarnikuuvoq.

Kommune Kujalleq Danmarkimi suliffeqarfiit imminut ingerlattuni aamma suliffeqarfiit allat NemKontomi piumasqaataanik atuinissamut periarfissanik ujartuivoq, tamatumalu ataani Danmarkimi NemKontomut aaqqissuussanik atuuttoqarsinnaanersoq, Kalaallit Nunaata aaqqissuussaanut tulluuttunik ujartuillunilu.

Inatsisartut Danmarkimi imaluunniit nunani allani malittarisassat akuerisaasimasut atuutsinneqartut akuerinissaanut periarfissaqanngillat. Kalaallit Nunaanni NemKonto aaqqissuussaq qallunaat atugaasa assinganik pilersitsisoqarnissaanut siunertaavoq, taammaammat qallunaat suliffeqarfii, pisortaqarfii, atorfeqarfii il. il. annertunerusumik ajornartorsiuteqanngitsumik Kalaallit Nunaanni aaqqissuussamut naleqqussarneqarsinnaanera naatsorsuutigineqarpoq.

Sulisitsisut siunnersuut § 5, imm. 2 inuinaat aamma suliffeqarfiit privatimik suliaannut pisortaqarfinit marsernertut isigaat. Inatsisitigut allannguinerit aasiit malersuinerimik, pisortaqarfiit inunnut aamma suliffeqarfinit namminersortunut annerusumik allaffissornissaannut kinguneqartussanngortumik, aallaaveqarput. Aalajangersagaq unnersuussutigineqarpoq peerneqassasoq.

Bankkontut allattorsimareersut pillugit paasissutissanik pisortaqarfinit allanit aallersinnaaneq ungasillineqarneranut, suna pequtaanersoq ersarissorineqanngilaaq. § 5-imut oqaaseqaataareersut tunngavigalugit, innuttaasoq imaluunniit suliffeqarfik kontumik, soorlu nammineerluni NemKontomik innersuussisimangippat paasissutissat taamaallaat aaneqarsinnaapput. NemKontomi aaqqissuussat iluaqutai piviusunngortinneqassappata, aaqqissuussamut amerlanerpaat peqataanissaat pingaaruteqarpoq.

Saniatigut Sulisitsisut, siunnersuut § 8, imm. 2 peerneqassasoq imaluunniit minnerpaamik pisortaqarfiit akiligassaqarfinit, taakku elektroniskimik akiliinermut aqutsineq pillugu

malittarisassat unioqutissimappagit, akiliinissaat kinguartinneqassanngitsoq siunnersuutigaa.

Aalajangersagaq atorunnaarnikuvoq.

Kommuneqarfik Sermersooq innersuussivoq, innuttaasut naatsorsuutiminnik killiffitsik pillugu aallersinnaanerit taamaallaat innuttaasup aamma aningaasaateqarfiup akornanni, NemKontomik pilersitsiffiusumiinnaq pisinnaassasoq.

Siunnersuummi matumani innuttaasup bankkontuanit naatsorsuutinik imaluunniit assigisaanik aallernissaq pillugu malittarisassanik malitaqarnissamut tunngavittaqaanngilaq. Taamaallaat, innuttaasup imaluunniit suliffeqarfiup kontunormu pigisaanik paasisutissat § 1-imi ilaasut, aamma kontumik aningaasaateqarfimmi sorlermi pilersitsisoqarsimasumit aaneqarsinnaapput.

Kommuneqarfik Sermersuup pisinnaatitaaffini DUT tunngavigalugu aningaasaqarnikkut taarsiivigineqarnissaq qinnutigaa. (Tamakkiisumik oqimaaqatigiittoqarnissaanut tunngavik).

Immikkoortoq 3-mi taaneqareersutut siunnersuut pisortaqaqfinnut akiliisartunut annertunerusumik sipaarfiussasoq naatsorsuutigineqarpoq. Tamanna aammattaaq kommuninut ikiorsiissutinik arlalinnik akiliisartunut atuuppoq. NemKontomut nalunaarsuiffimmik pilersitsineq aamma ingerlatsineq aningaasartuuteqarnermik kinguneqassaaq. Aallaqqaatitut naatsorsuutigineqarpoq aningaasartuutit taakku Namminersorlutik Oqartussanit aningaasartuutigineqassasut. DUT tunngavigalugu ilimanarneruvoq, kommunit NemKontop aaqqissuussaanut ikaarsaarnerani sipaarutit kommunit tapiissutaanut annikillisaassasut.

Tusarniaanermut peqataasut allat siunnersuummut tapersersuipput imaluunniit oqaaseqaateqaanngillat.

Siunnersuummi aalajangersakkanut ataasiakkaanut nassuiaatit

§ 1-imut

§ 1-imut

Aalajangersakkap siunnersuutaasup siunertaraa, kikkut tamaasa Kalaallit Nunaanni najugaqartut aamma inatsisitigut pisinnaatitaasut, aningaaserivimmi kontumik innersuussinissamut, siunnersuummi NemKontomik taaneqartumik pisussaaffilissallugit. Najugaqarnermik piunasaqaammut nalornineq pingitsoorniarlugu, aalajangersagaq CPR-imi nalunaarsuivimmut atavoq, kingusinnerusukkut pineqartoq Kalaallit Nunaannit aallarsimasutut nalunaarsorneqannginissaa pingitsoorniarlugu.

Kontu innersuussaq aningaaserivimmi pilersinneqassaaq, aningaaserivillu Kalaallit Nunaanni, Danmarkimi, Savalimmiumi imaluunniit nunani allani inississimanera apeqqutaanngilaq. NemKontomik pilersitsinermut isumaqatigiissut, aamma kontup aqunneqarnera, sullitap aningaaseriviullu akornaniinnaq ingerlassaaq, inatsisinillu allanit aamma tunngaviummik obligationinik nalinginnaasunit naleqqussarneqarneqarluni. Siunnersuut, taakkununga malittarisassanut tunngavinnullu allannguisunik imaluunniit ilassutaasunik imaqqanngilaq. Ass. siunnersuutip aningaaseriviit kontumik naatsorsuisinnaanerat annertusissanngilai imaluunniit ajornerulersissanngilai. Assinganik kontunik nuussinermut aamma atorunnaarsitsinermut il. il. atatillugu malittarisassat nalinginnaasut atuupput, aamma kontumik nuussineq aamma atorunnaarsitsineq il. il., NemKontotut innersuunneqartuugaluarpat atuupput.

Amerlanertigut innuttaasooq imaluunniit inatsisitigut pisinnaatitaasooq kontu nammineq pigeriikkani, NemKontotut innersuutissagaa naatsorsuutigineqarpoq. Kisianni aamma kontumik immikkut atortorissaaruteqanngitsumik nutaamik innersuussisoqarsinnaavoq. Kontu pisortani oqartussaasunit akiliiffissatut atornissaa pingaarnaruvoq. NemKonto taamaasilluni pisortani oqartussaasunit innuttaasooq imaluunniit suliffeqarfik, akiliinermik aalajangersimasumik akiliiffissamik aningaaserivimmi kontumik allamik innersuussisimangippat atorneqarsinnaavoq, tak. imm. 3.

Pisortani oqartussaasumit aningaasat akiligassat, kontumut sumut akilerneqassanersut nalornissutigineqarpat, kontu § 1 naapertorlugu innersuussutigineqartoq atorneqarsinnaavoq.

Ilanngullugu, innuttaasunut, suliffeqarfinnut imaluunniit inatsisitigut pisinnaatitaasunut allanut aningaasanik akiliineq inatsimmi aalajangerneqarpat NemKontomut pissasooq NemKonto atorneqarsinnaavoq.

Imm. 1-imi, inuit 18-ileereersut, Qitiusumik Inuit Allattorsimaffiat pillugu inatsit pillugu Kalaallit Nunaanni peqqussummi § 3, imm. 1, nr. 1 naapertorlugu inuup normuanik tunineqarsimasut, aningaaserivimmut kontumik – NemKontomik – pisortani oqartussaasut

anigaasanik akiliinernik tigusiiffiginnaasaminnik innersuussinissamut pisussaaffeqassasut siunnersuutigineqarpoq.

Ukiut pillugit piunasaqaatip saniatigut CPR-normumik tunniussineq inunnik innersuussinissamut pisussaaffeqarnermut ilaasunik killiliinissamut aamma piunasaqaatit toqqarneqarpoq. Inuit 18-it ataallugit ukiullit inuillu Namminersorlutik Oqartussanit naalagaaffiup avataanut aallartitat, Qitiusumik Inuit Allattorsimaffiat pillugu inatsit pillugu Kalaallit Nunaanni peqqussut naapertorlugu inuup normuanik tunisissimasut, pisortanilu oqartussaasunit akiliinernik tigusiisartut, aamma NemKontomik innersuussissapput.

Imm. 2-mi siunnersuutigineqarpoq, inatsisitigut pisinnaatitaasut, Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaanni § 1 naapertorlugu, CVR-normumik tunineqarsimasut, pisortani oqartussaasunit anigaasanik akiliinernik tigusiinissamut kontumik innersuussinissamut pisussaataitaassasut. Tamanna aamma inummut, sulisitsisutut imaluunniit namminersorluni inuussutissarsiuummik ingerlatsisutut, CVR-normumik tunineqarsimasumut atuuppoq. Suliffeqarfiit akileraartarnermut ingerlatsivimmi inuussutissarsiuummik ingerlatsisutut nalunaarsorneqartariaqarsimasut, innersuussinissamut pisussaaffimmik assingusumik pisussaaffeqarput. Oqaatigineqassaaq, killiliineq tamanna Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaanni § 2-mi inatsisitigut immikkoortunik killiliinermiit annikinnerusoq, tassani pisortani oqartussaasut imm. 2-mi siunnersuutigineqartumi ilaangimmata. Naalakkersuisulli § 1, imm. 8, oqaaseqatigiit aappaanni aalajangersagaq naapertorlugu, malittarisassanik, kommunit kommuninilu kateriffiit anigaaserivimmi kontumik innersuussinissamut pisussaaffilerlugit aalajangersaasinnaavoq.

Pisortani oqartussaasut pisussaaffiaasumik anigaaserivimmi kontumut anigaasanik akiliisinnaavoq, imm. 1-2-mi allassimasut malillugit.

NemKontomut aqqissuussaq aqqutigalugu akiliutit nassiunneqassappata, akiligassamik tigusiisup kinaassusaanut paasissutissat CPR imaluunniit CVR-normu pisariaqarput. Tamanna isumaqarpoq, peqatigiiffik CVR-imi allattorsimaffimmut ilanngussimanngippat aamma NemKontomik innersuussimanngippat, kommuni peqatigiiffimmut tapiissutinik akiliisussaq nammineerluni akiliissasoq. Imm. 3-mi siunertaavoq pisortat allaffissorneranni ajornannginnerulersitsisoqassasoq, tassa tapiiffigineqartut il.il. aallaaviusumik kinaasuutsiminnik nalunaaruteqarnissamut imatut peqqunneqassammata innuttaasunut/suliffeqarfinnut akiliisarneq assigalugu akiliisoqartassammat, tassa NemKonto atorlugu. Tamannali imm. 4 pineqartillugu atuutinngilaq, ataaniittoq takuuk.

Kiap peqatigiiffik nalunaarsussaneraa piunasaqaataannngilaq. Taamaammat pisortaqarfik akiliisussaq peqatigiiffimmik isumaqatiginninnerup kingorna peqatigiiffik sinnerlugu nalunaaruteqarsinnaassaaq. Pisortanit akissarsiaqartarnermut piunasaqaatit NemKontomik innersuussinissamut pisussaassuseq eqqaassanngikkaanni, peqatigiiffimmut CVR normumik tunniussineq allanik pisussaaffiliinngilaq.

Peqatigiiffinnut il. il. namminerisamik CVR-normumik nalunaarsorneqarnissamut piumasaqaatinut eqquutsitsinngitsut, imm. 3-mut ilanngunneqassanngitsut imm. 4-mi siunnersuutigineqarpoq. Assersuutigalugu tassaasinnaapput peqatigiiffiit pineqatigiiffiup siunertaa (malittarisassai) pillugu isumaqatigiissusiorfigineqarnikuunngitsut.

Inuk imaluunniit inatsisitigut pisinnaatitaasoq kontumik allamik akiliiffissamik innersuussisimappat, imm. 5 naapertorlugu NemKontomut akiliisoqassanngilaq. Tapiissut apequtaatillugu NemKontonut arlalinnut innersuussisinnaanermut periarfissaq pillugu, § 4, imm. 3-mut nassuiaatinut innersuussisoqarpoq.

§ 1, imm. 1 imaluunniit 2 naapertorlugit pisortanit akiliinermi siullermi kingusinnerpaamik kontumik innersuussisoqassasoq imm. 6-imi aalajangersarneqarpoq.

Imm. 7-imi, Naalackersuisut Qitiusumik Inuit Allattorsimaffianni, Qitiusumik Suliffeqarfinnik Nalunaarsuiffimmi imaluunniit akileraartarnermut ingerlatsivimmi inuussutissarsiummik ingerlatsisut nalunaarsuivianni nalunaarsuinermit imaluunniit nalunaarsuinermit allannguinermit atatillugu, § 6 naapertorlugu aqqissuussinermik akisussaasumut NemKonto innersuunneqartoq pillugu nalunaaruteqartoqartassasoq malittarisassanik aalajangersaasinnaasut siunnersuutigineqarpoq. Tamanna siunnersuummi § 2, imm. 1-imi itisilerneqarpoq. Nalunaaruteqarnissamut pisussaaffik kontumik piginnittumiissaaq, kisianni pineqaatissartaqassanngitsoq siunnersuutigineqarpoq. Pisinnaatitsissummut siunnersuutigineqartumut tunngaviuvoq, siunertamut tulluarsinnaammat, Qitiusumik Inuit Allattorsimaffiannut, imaluunniit Qitiusumik Suliffeqarfinnik Nalunaarsuiffimmut nalunaarsuinermit imaluunniit nalunaarsuinermit allannguinermit atatillugu NemKontomik innersuussineq pisassasoq. Pisinnaatitsissummi siunertarineqanngilaq, nalunaarsuivinni taaneqartuni nalunaarsuinermit piumasaqaatinik allanngortoqarsinnaanera. Taamaammat nalunaarsuinissamut piumasaqaatit malinneqarpata innuttaasoq imaluunniit suliffeqarfik nalunaarsorneqarsinnaanngitsoq, innersuussinissamut pisussaaffimmik illuartitsinerup nassatarisinnaanngilaa.

Imm. 8, Naalackersuisut CPR-imut aamma CVR-imut nalunaarsuivinnit nalunaarsuinermit nalunaarsuinerit allat, NemKontomik innersuussinissamut pisussaaffimmik imaqaarnissaannik malittarisassanik aalajangersaanermut pisinnaatitaanissaanik imaqarpoq. Tamanna nunami allamiunut Kalaallit Nunaanni najugalinnut, CPR-normumut taarsiullugu nalunaarsorneqarnermit normumik assingusumik tunineqartunut atuuppoq. Naalackersuisuttaaq aalajangersarsinnaavaat, imm. 1-3-mi inuit aamma inatsisitigut pisinnaatitaasut taaneqartut saniatigut, ass. pisortani oqartussaasut, innersuussinissamut pisussaataaermit ilaassasut, tak. qulaani imm. 2-mut nassuiaatit.

§ 2-mut

NemKontomik innersuussineq aqqissuussinermik akisussaasumut, § 6 malillugu toqqarneqartumut pissasoq, imm. 1-imi siunnersuutigineqarpoq.

Inatsisartut inatsisaat tunuliaqutaralugu kontot pillugit paasissutissat il. il. aaneqartut, § 5, imm. 1-4, Inunnut paasissutissanik suliarinnittarneq pillugu peqqussut aqquutigalugu inuit paasissutissaanik suliarinnittarnermut malittarisassat tunngavigalugit suliarineqassapput. Tamanna isumaqarpoq sammisamut katersineq tunngavilersorluakkamik pissasoq, kingusinnerusukkullu suliarinninneq siunertanut naleqqiuttusaalluni. Paasissutissat suliarineqartut naleqqutissapput amigarnatillu, aamma paasissutissat katersuinissamut kingornalu suliarinninnissamut kisiat pisariaqartunik imaqarlutik. Taakku saniatigut paasissutissat nutarteriaannangorlugit aqqissorneqassapput. Paasissutissat eqqunngitsut imaluunniit salloqittaataasut piaarnerpaamik peerneqassapput imaluunniit aqqinneqarlutik. Inuit Allattorsimaffiannut paasissutissanut inatsit § 5, imm. 5-imut tunngatillugu, § 5-imi peersinissamut killigitamut allassimasoq innersuunneqarpoq.

Imm. 2-p, inuit inatsisitigullu pisinnaatitaasut siunnersuummi § 1-imut ilaasut kontumik innersuussereeraluartut, qaqugukkulluunniit kontumik nutaamik innersuussinissaannut periarfissippai. Allanguutit paasissutissiisutigineqartut oqaaseqatigiit aappaat malillugit, piffissap nalunaaruteqarnerup kingorna kingusinnerpaamik aningaaseriviup ammaffiata tallimaannit inatsisitigut atuutilissapput.

Tamanna soorunalimi akornutaanngilaq, kontumik piginnittup, piffissaagallartillugu allanguinissamik nalunaaruteqarnissamut kissaateqartup, nalunaaruteqarnermi kingusinnerusukkut inatsisitigut atulersitsinissaq aalajangersassappagu.

NemKonto nutaaq inatsisitigut atuutilerpat, paasissutissat NemKonto ”pisoqqami” nalunaarsorfianit peerneqassapput.

Imm. 3-mi, inuit toqunerini imaluunniit inatsisitigut pisinnaatitaasut atorunnaarnerini kontunormut nalunaarsuivimmuut nalunaarsorneqarsimasut, siunnersuut § 5 naapertorlugu pilersinneqarsinnaasut nunguterneqassasut aalajangersarneqarpoq. Naalakkersuisut § 6 naapertorlugu aqqissuussaannermi akisussaasoq toqqagaat, nunguterinissamut pisussaataaaffeqarpoq. Pisussaataaaffik taanna atuutilissaaq, pigisanik agguaassisarnermut eqqartuussiviup toqusup kingorna pigisaanik agguaalluni naammassinnippat. Eqqartuussiviup suliffeqarfik akiliisinnaajunnaartutut nalunaarutigineqartoq pillugu pigisaanik suliaqarnera naammassippat, inatsisitigut pisinnaatitaasoq pinngitsaaliissummik atorunnaarsinneqarpat, sulianik unitsitsineq atulersinneqarpat, imaluunniit inatsisitigut pisinnaatitaasoq allatut atorunnaarsinneqarpat inatsisitigut pisinnaatitaasut pisussaaffiat atuutilersarpoq.

Inuk, sulisitsisutut imaluunniit namminersorluni inuussutissarsiummik ingerlatsisutut CVR-normumik tunineqarsimasoq - tak. siunnersuummi § 1, imm. 2, oqaaseqatigiit aappaat, taakkunungalu nassuiaatit – akiliisinnaajunnaartutut nalunaarutigineqarpat, pineqartup NemKontoa pillugu paasissutissat nalunaarsuivimmi peerneqassapput. Pineqartoq aamma nalinginnaasumik § 1, imm. 1-imut ilaasassaaq. NemKonto pillugu paasissutissaq aalajangersagaq naapertorlugu innersuussaq - § 1, imm. 2, oqaaseqatigiit aappaat

naapertorlugu kontumut innersuunneqartumut assingusinnaasoq - pineqartup siunissami sammisanut allanut pisariaqartimmagu, nunguterneqassanngilaq.

Akiliisinnaajunnaartutut nalunaarutigineqartoq inuuppat imaluunniit suliffeqarfiuppat namminersortoq, aamma akiliisinnaajunnaarnermi pigisat nutaamik NemKontotaarnissaat pisariaqarpat, pigisanik agguaassisarnermik eqqartuussivik aamma akiliisinnaajunnaartup pigisaanik nakkutiginnittup, akiliisinnaajunnaarnermi pigisanut NemKontomik nalunaarsuinissaanut akisussaaffigaat. Imaassinaavoq pisortat akiliisinnaajunnaarnermi pigisanut, aningaasanik akiliissallutik, taannalu akiliisinnaajunnaartutut nalunaarutigineqartoq allanik sammisassaqaassasoq NemKontomik pisariaqartunik.

§ 3-mut

Aalajangersaaneq tunngaviliivoq, nunami akiliinernut assingusunut, ulloq taanna sullississutaasunut sanilliullugit piffissami kingusinnerusumi tiguneqaraluarpataluunniit, naalagaaffiup iluani akiliinerit piffissaq eqqorlugu akiliinerusimappata innuttaasunut suliffeqarfinnullu Danmarkip, Savalimmiut aamma Kalaallit Nunaata avataaniittunut akiliinerit piffissaq eqqorlugu akiliinertut isigineqassasut.

Aalajangersakkap siunnersuutigineqartup, akiliineq qaqugukkut piffissamik eqquinersoq aalajangersassallugu siunertarinngilaa. Akiliinerup piffissap eqqornera inatsimmit, tigussaasunik akiligassaqaqarnermik aalajangersaasumit, aamma ilaatigut pisortani oqartussaasut aamma tigusisussap akornanni isumaqatigiissutaannit aalajangerneqartarpoq. Aalajangersakkap taamaallaat siunertarivaa pisortani oqartussaasut, aningaaseriviit nunani allani kontunut aningaasanik nuussineranut atatillugu kinguaattoorneranut, akisussaaffeqassanngitsut.

§ 4-mut

Imm. 1-imi siunnersuutaavoq, Naalakkersuisut pisortani oqartussaasut, inunnut aamma inatsisitigut pisinnaatitaasunut inatsisissatut siunnersuummi § 1-imi ilaasunut, NemKontomik innersuussisimanngitsut qanoq pisussaaffeerutsitsisunik akiliisinnaanersut malittarisassanik aalajangersaanissamut piginnaatinneqassasut. Pisinnaatitsissummi siunertaavoq – immaqa qaqutigut pisartussaq - § 1 naapertorlugu innersuussinissamut pisussaaffiup malinneqannginnera nalilersussallugu. Pisuni taama ittuni pisortani oqartussaasut pisussaaffeerutsitsisumik akiliisinnaanersut malittarisassanik sukumiinerusunik aalajangersaasoqarnissaa pisariaqartinneqarpoq. Tamanna oqartussaasup, innuttaasumut/suliffeqarfimmut tigusiffiusinnaasumik aningaaserivimmi kontumik pilersitsineratigut pisinnaavoq. Kontu Namminersorlutik Oqartussanit imaluunniit kommuninit pigineqassaaq. Tigusisup kontu pilersinneqartoq pillugu nalunaarfigineqarnissaa, pisussaaffeerutsitsisumik akiliinermut piumasaqaataavoq.

Piginnaatitsinermik nikerarsinnaanermut periarfissaq qulakkeerneqassaaq, taamaasillunilu akiliinermi ingerlatsinernut malittarisassat, innuttaasut, suliffeqarfiit, aningaaseriviit kiisalu

pisortani oqartussaasut innimittassammagit. Inuit aamma suliffeqarfiit, aningaaserivimmi kontumik pisaarsinnaangitsut pillugit nassuiaatit nalinginnaasut innersuunneqarput.

Pisortani oqartussaasut taamaasillutik qulakkiissavaat, aningaasanik piffissaq eqqorlugu akiliisoqartarnissaa, kisiannili kinguaattoornissamut, matuma ataani innersuussinissamut pisussaaffimmik illuartitsinerup kingunerisaanik aningaasartuuteqarnerunissamut aarlerinaat, innuttaasunit aamma suliffeqarfinnik il. il. nammanneqassaaq.

Imm. 2-mi piumasaqaataavoq, akiliineq periarfissaanngissappat, assersuutigalugu tiguisussap nunamut allamut nuunnerminut atatillugu NemKontoni matusimanera pequtaalluni aamma najugaqarfiup nutaap imaluunniit aningaaserivimmi kontup nutaap paasissutissaanik tunniussisimanngippat, akiliinissat “utaqqiisaasumik kontumut” ikineqarallassapput. Allaffissornermik peqquteqartumik siunnersuutigineqarpoq, aningaasat utaqqiisaasumik kontumiittut Namminersorlutik Oqartussanut tunngatillugu Nunatta Karsianut imaluunniit kommunit tunngatillugu kommunit karsianut nuunneqartassasut, akiliinerit akiliiffissap ukiut tallimat siornatigut ullulernerqarfianit pisimanngippata. Aningaasaatit pissaritinneqartut pillugit tiguisussap pisinnaatitaaffiinut apeqqutit pillugit, malittarisassat nalinginnaasut atuuttut malillugit aalajangiisoqassaaq, pisassaritinneqartut suulluunniit qaquguluunniit pisoqalisoorinissamut malittarisassat ilaallutik.

Imm. 3 tunngavissiivoq, kontunik arlalinnik innersuussisinnaanermut Naalakkersuisut malittarisassanik aalajangersaasinnaasasut. Assersuutitut taaneqarsinnaavoq, inuit imaluunniit suliffeqarfiit il. il. akiliinernut assigiinngitsunut kontunik assigiinngitsunik toqqaasinnaanermut periarfissinneqarnerat. Taamaasilluni § 4, imm. 2 naapertorlugu malittarisassat atulersinneqartut, inuup imaluunniit inatsisitigut pisinnaatitaasup kontunik arlalinnik, NemKontotut atortunik nalunaarutiginnissinnaaneranik imaqaassapput. § 1, imm. 3-mi siunnersuutigineqartup akerlianik, tassani innuttaasut imaluunniit suliffeqarfiit kontumik allamik akiliiffissamik innersuussisinnaaneranik, imm. 5-ip imaraa, kontunik arlalinnik, pisortat akiliinerinut assigiinngitsunut atorneqarsinnaasunik innersuussisoqarsinnaasoq.

§ 5-imut

Imm. 1-imi aalajangersakkamik siunnersuutigineqartoq tunngavissiivoq, nalunaarsuivimmik, innuttaasut aamma suliffeqarfiit il. il. siunnersuummi §§ 1 aamma 2-mut ilaasut aningaaserivimmi kontut pillugit paasissutissanik imaqartumik pilersitsinissaq pillugu Naalakkersuisut malittarisassanik aalajangersaasinnaasut. Nalunaarsuivimmik pilersitsinissamut siunertaavoq kontut, innuttaasut aamma suliffeqarfiit aaqquissuusaanermik akisussaasumut NemKontotut nalunaarutigisaat pillugit paasissutissanik katersinissaq. NemKonto pillugu aaqquissummik pilersitsinermut tunngaviuvoq, kontut, NemKontotut nalunaarsorsimasut pillugit paasissutissanik qitiusumik katersuinissaq, kiisalu aningaasanik akiliinermut atatillugu paasissutissanik pissarsinissaq. NemKonto pillugu aaqquissummut siunnersuutigineqartup taamaasilluni, nalunaarsuivik taamaattoq pilersinneqarnissaa pisariaqartippaa, taamaanngippat aaqquissut sulinermi atorsinnaassanngilaq.

Inuit pillugit paasissutissanut inatsimmut atatillugu Naalakkersuisut akisussaasutut naatsorsuutigineqarput.

Inatsisartut inatsisaanni peersinissamut killigititamik aalajangersaanissaq siunnersuutigineqanngilaq, tassani siunertamut tulluarnerusumik § 5, imm. 1 naapertorlugu malittarisassanik aalajangersaasoqarsinnaammat. Nalunaarutip atulersinneqannginnerani Datatilsynimut oqaaseqaateqarfigisassatut saqqummiunneqassaaq.

Imm. 2 periarfissiivoq, Naalakkersuisut nalunaarsuivimmik pilersitsinermut atatillugu, aningaaserivimmi kontut pillugit paasissutissanik pisortani oqartussaasunit allanit aamma akissarsialerivinnit, pisortani oqartussaasut imaluunniit suliffeqarfiit namminersortut sinnerlugit akissarsiat pillugit paasissutissanik suliaqartartunit aallersinnaassasut. Tamatumani naammassinninnerup immikkoortunut marlunnut avinneqarnissaa naleqquttuusinnaavoq: Immikkoortoq siulleeq, inuit suliffeqarfiillu nammineerlutik nalunaaruteqarsinnaanerannik ammaassinermik imaqarpoq. Immikkoortoq tulliusumi, eqimattanut nammineq nalunaaruteqarsimannigitsunut, pisortanit ikiorsiissutinik »kontumit kontumut« pisartunut, imaluunniit akissarsialerivik aqqutigalugu akissarsianik akiliiffigitittartunut paasissutissanik automatiskimik nalunaarsuivimmut nuussisoqartassalluni. Naggataagut eqimattani kiserngoruttoqassaaq, ikiorsiissutinik akiliinermut assigisaanullu siullermut atatillugu kontumik tunniussinissamik pisariaqartitsiffiusinnaasumik.

Malugineqassaaq, kontunormu, inummit imaluunniit inatsisitigut pisinnaatitaasumit § 1-imut ilaasumit pigineqartoq, kiisalu kontu aningaaserivimmi sorlermi pilersinneqarsimanersoq pillugit paasissutissat kisimik ingerlateqqinneqarsinnaammata. Taamaattumik periarfissaanngilaq malittarisassanik aalajangersaassalluni, ass. kontup imarisai pillugit paasissutissanik ingerlatitseqqissinnaaneq. Naalakkersuisut aalajangersinnaavaat, aaqquissuussinermi akisussaasoq, siunnersuummi § 6 naapertorlugu toqqarneqartoq, pisinnaatitaasoq paasissutissanik taaneqartunik aallernissamut.

Nalunaarsuivimmik pilersitsinermut atatillugu Naalakkersuisut pisariaqartitsinermi Datatilsyni ilaatissinnaavaat. Inuit pillugit paasissutissanik suliarinnittarneq pillugu inatsimmi malittarisassat malinneqartussaassapput, tamatuma ilaatigut imaraa, ingerlatitseqqinneq, paasissutissiinissamut pisussaaffik aamma nalunaarsorneqartup naammagittaalliuteqarnissamut pisinnaatitaaffia pillugit inatsimmi malittarisassat NemKonto pillugu paasissutissanik suliaqarnermut atatillugu atuuttut. Inummut paasissutissanik suliarinnittarneq pillugu inatsimmi kapitali 12-imi malittarisassat malillugit nalunaarsuiffik Datatilsynimut nalunaarutigineqassaaq, kiisalu inuit pillugit paasissutissanik nakkutiginninnissaq pillugu isumannaatsuunissamut iliuitsit, Kalaallit Nunaanni pisortat ingerlatsineranni suliarineqartut pillugit nalunaarut nr. 1401, 30. november 2016-imeersumi malittarisassat eqqortinneqassallutik. Naalakkersuisut inummut paasissutissanik suliarinnittarneq pillugu inatsit eqqarsaatigalugu paasissutissanut akisussaasuvoq, tak. inatsimmi § 3, nr. 4, aaqquissuussinermullu akisussaasoq, Naalakkersuisut siunnersuummi § 6 naapertorlugu toqqagaat, paasissutissanik suliaqartutut isigineqassaaq, tak. inuit pillugit paasissutissanik suliarinnittarneq pillugu inatsimmi § 3, nr. 5.

§ 6-imut

Siunnersuutaavoq, Naalakkersuisut aaqqissuussinermut akisussaasumik, kontunit, innuttaasunit aamma suliffeqarfinit il. il. § 1 malillugu imaluunniit tamanna naapertorlugu malittarisassanik atulersinneqarsimasut pillugit paasissutissanik allaffissornermik suliassaqartumik toqqaassasut. Naalakkersuisut pisortani oqartussaasoq alla imaluunniit suliffeqarfik namminersortoq il. il. aaqqissuussinermut akisussaasutut toqqarsinnaavaat. Piumasaqaataavorli toqqarneqartoq Danmarkimi, Savalimmiuni imaluunniit Kalaallit Nunaanni najugaqavissuussasoq. Aaqqissuussinermut akisussaasup suliassaraa kontut innersuussutaasut pillugit paasissutissat pillugit nalunaarsuivimmik allaffissorinissaq, matuma ataani § 1-imi inunnit taaneqartunit paasissutissat pissarsiarissallugit, kiisalu pisortani oqartussaasut, innuttaasunut aamma suliffeqarfinit il. il. akiliisartussat, paasissutissanik pissarsinissaat qulakkiissallugu.

Oqaaseqatigiit aappaat malillugu, pisortani oqartussaasut aamma suliffeqarfiit namminersortut il. il. aaqqissuussinermut akisussaasutut toqqarneqarsinnaapput. Eqqarsaataavoq, aaqqissuussinermut akisussaasoq ataasiinnaq toqqarneqassasoq. Naalakkersuisut aaqqissuussinermut akisussaasumik toqqaanissaq sioqqullugu qulakkeertariaqarpaat, aaqqissuussinermut akisussaasutut suliassap sularinissaanut misilittakkat pisariaqartut aamma piginnaasat pisariaqartut pigissagai. Periarfissaassaaq, suliassap immikkut naammassineqarnissaa, imaluunniit pisortani akiliisarnerit aaqqissuussaananerannik annertunerusumik nutarsaanermut ilaasutut.

Aaqqissuussamut akisussaasuusoq paasissutissanik sulialittut isigineqarpoq, aamma paasissutissanik suliqaarnermut isumaqatigiissut pillugu malittarisassaq, Inuit Allattorsimaffiannut paasissutissanut inatsimmi atorneqarfissaa allassimavoq.

Imm. 2-mi siunnersuutigineqartoq malillugu, Naalakkersuisut aaqqissuussinermut akisussaasup suliassai pillugit malittarisassanik sukumiinerusunik aalajangersaasinnaapput, matuma ataani aaqqissuussinermut akisussaasup suliai pillugit nakkutilliineq pillugu aamma aalajangersaasinnaallutik. Tamanna pingaartumik atuutilissaaq, suliffeqarfik namminersortoq assigisaaluunniit aaqqissuussinermi akisussaasutut toqqarneqarpat, Naalakkersuisut aaqqissuussinermi akisussaasumik nakkutilliinissaannut malittarisassanik aalajangersaasoqassasoq.

Assersuutigalugu malittarisassat inuit nalunaarsuivimmut isersinnaasut atonerluisinnaanissaannik killilersuiniarnermik imaqarsinnaapput. Tamanna ass. isumannaallisaalluni ingerlariaatsinik suliqaarnikkut, sulisunik, nalunaarsuivimmut isersinnaasunik isumannaallisaanikkut akuerinninnikkut kiisalu eqimattat ikittuinnaat nalunaarsuivimmut toqqaannartumik isersinnaanissaasa qulakkeerneratigut pisinnaavoq. Ilanngullugu malittarisassanik aalajangersaasoqarsinnaavoq, kina nalunaarsuivimmit paasissutissanik tiguisimanersoq, kiisalu sulisut ataasiakkaat paasissutissaat suut tiguisimanaat nakkutigisinnaassallugu periarfissaassasoq. § 6, imm. 2-mi pisinnaatitsissut

naapertorlugu, suliffeqarfimmi aaqqissuussinermut akisussaasumi sulisut, nalunaarsuivimmut isersinnaasut nipangiussisussaataitanerannut najoqqutassanik aalajangersaasoqassaaq. Suliffeqarfik aaqqissuussinermut akisussaasuusoq suliffeqarfiuppat namminersortoq assigisaaluunniit, pingaartumik tulluurtuussaaq. Malittarisassat naapertorlugit ilanngullugu malittarisassanik aalajangersaasoqarsinnaavoq, suliffeqarfik aaqqissuussinermut akisussaasuusoq sillimmasissasoq, paasissutissanik atornerluisoqassagaluarpat annaasaasinnaasunik matussusiisussamik.

Eqqarsaataavoq, sulisut taamaallaat, atorfinni nalunaarsuivimmit paasissutissanik immikkut tiguisarnissamut pisariaqartinneqartut, nalunaarsuivimmut isersinnaanissaannut akuersissuserneqassasut. Paasissutissat, sulisut taakku ilisimaligaat, pisortani atorfillit nipangiussisimasussaatanerannut malittarisassat nalinginnaasut naapertorlugit nipangiusimasussaataapput.

Ilanngullugu malittarisassanik aalajangersaasoqarsinnaassaaq, suliffeqarfik aaqqissuussinermut akisussaasoq pillugu pisortani oqartussaasumut naammagittaalliortoqarsinnaaneq. Aalajangersagaq, malittarisassanik aalajangersaanissamut, inummut paasissutissanik suliarinnitarneq paasissutissat pillugit inatsit malillugu Datatilsynip nakkutilliinissaanut periarfissaanik killilersuisussamik tunngaviliinngilaq. Imm. 2 naapertorlugu malittarisassanik aalajangersaasoqarpat, paasissutissanik suliaqarnermut atatillugu inuit nammineq inuunerannik illersuinissamut sunniuteqartumik, inummut paasissutissanik suliarinnitarneq pillugu inatsimmi § 57 naapertorlugu, Datatilsynip oqaaseqaataanik aallertoqassaaq.

§ 7-imut

Siunnersuutaavoq Naalakkersuisut qallunaat aamma savalimmiormiut oqartussaasuunik isumaqatigiissusiornermik pisinnaatitaanissaat, naalagaaffeqatigiinnermi immikkoortortat marluusut pisortatigoortumik Kalaallit Nunaannit akiligassanik ataqatigiimmik aaqqissuussat, aaqqissuussaanerit il. il. ingerlatitseqqinnermut atorneqartut atorsinnaanerit pillugit.

Naalagaaffeqatigiinnermut tamarmut peqatigiilluni isumaqatigiissusiornissamut killiliinermut tunngatillugu, tamarmik assigimmik aningaasaateqarfiit aaqqissuussanerit pequtaavoq.

IT-nut aamma teknikikkut apeqqutit akiligassanik passussinermut attuumassutillit saniatigut, aammattaaq naalagaaffeqatigiinnerup ilaani pisortaqaqarfinnit paasissutissanik avitseqatigiinnernut il. il. pillugit isumaqatigiissusiornernik pisinnaatitaanermik ilaqarpoq.

§ 8-mut

NemKonto pillugu Inatsisartut inatsimmut malittarisassai kiisalu pisortanit akiliinernik qarasaasiakkut akiliisarnermut ikaarsaarnissamut piunasaqaatit aamma suliffeqarfinnut imminnut pigisunut il. il., aningaasaliisarnermi inatsimmut tiguneqarsimasunut atuutissasut siunnersuutigineqarpoq. Assinganik suliffeqarfinnut imminnut pigisunut aamma

suliffeqarfinnut namminersortunut, kommunimik ingerlatsinissamut isumaqatigiissuteqarsimasunut atuuppoq, taakku ulluinnarni »kommunip suliffeqarfiitut nalinginnaasutut« isigineqarsinnaapput. Assinganik Naalackersuisut aalajangersarsinnaavaat, Inatsisartut inatsisaanni malittarisassat aamma suliffeqarfinnut imminnut pigisunut il. il., aningaasartuutitut matussusiinissamut imaluunniit ikiorsiissutinik allanik Namminersorlutik Oqartussanit tiguisartunut atuutissasut.

§ 9-mut

Naalackersuisut Inatsisartut inatsisaata piffissaq atuutilerfissaa aalajangissagaat siunnersuutigineqarpoq. Matumuuna IT allaffissornikkullu pissutsit pillugit aaqqinneqareersimassasut inatsisip atuutsilinnginnerani innersuussutigineqarpoq.

Imaassinnaavoq Inatsisartut inatsisaanni aalajangersakkat piffissani assigiinngitsuni atulersinneqarnissaat tulluartsuussasoq, soorlu Namminersorlutik Oqartussat aamma kommunit ataasiakkaat piffissami atuutilerfissai assigiinngissinnaammata. Tamatumunnga, allaffissornikkut suleriaatsit arlallit allannguutigineqartussaanagerat attuumassuteqarpoq.